

मार्निंग डोगरी न्यूज़ बुलेटिन, समे. 09-20 Hrs

<><><><><><>

Headlines

- प्रधानमंत्री नरेन्द्र मोदी होर अज्ज दिनै 11 बजे परीक्षा पे चर्चा कार्यक्रम दे 8में संस्करण च विद्यार्थिएं कन्नै गल्लबात करडन।
- प्रधानमंत्री होर अज्जै थमां फ्रांस ते अमरीका दे दौरे पर जा करदे न जिस दरान ओह पेरिस च फ्रांस दे राष्ट्रपति हुंदे कन्नै ए.आई. एक्शन सम्मेलन 2025 दी सांझे तौरा पर अध्यक्षता करडन।
- लेफ्टिनेंट गवर्नर मनोज सिन्हा होरें आखेआ ऐ जे नौजवानें गी आर्थिक विकास ते समाजी तब्दीलिएं दी अगुआई लाजमी तौर उपपर करनी लोड़चदी ऐ।
- मंत्री जावेद अहमद राणा होरें सद्भाव आहले समाज दे निर्माण लेई बरोबर, न्याऽ ते दया भावना दी जरूरतै पर जोर पाया ऐ।
- मौसम विभाग नै अगले 2 दिन जम्मू-कश्मीर च टामीं-टामीं थाहरें उपपर हौली बरखा बरने ते उच्चिएं धारें पर बर्फबारी दी पेशगोई कीती ऐ। ऐगती स्यालें दरान बरखा च बड़ी मती कमी दर्ज कीती गोई ऐ।

<><><><><><>

Pariksha Pe Charcha

परीक्षा पे चर्चा दा 8मां संस्करण कल नमीं दिल्ली दे भारत मंडपम च आयोजित कीता जाग। इस चर्चा च हर बरे प्रधानमंत्री नरेंद्र मोदी होर बच्चे कन्नै उन्दे मतेयानें दे बारै च गल्लबात करदे न। सब्बनें राज्यें ते केंद्र शासित प्रदेशें थमां 36 विद्यार्थिएं गी प्रधानमंत्री हुंदे कन्नै गल्लबात करदे लेई तालेआ गेदा ऐ। इस बरे कोई 5 करोड़ लोक मुल्खै दे बक्ख-बक्ख हिस्से थमां इस कार्यक्रम कन्नै जुड़डन। अज्ज दिने 11 बजे प्रधानमंत्री होर बच्चे कन्नै गल्लबात करंगन। परीक्षा पे चर्चा इक ऐसे मंच दा कम्म करदी ऐ जित्थे प्रधानमंत्री सिद्धे विद्यार्थिएं, उन्दे अध्यापकें ते माता-पिता कन्नै बी गल्लबात करदे न ते मतेयानें गी लेइयै उन्दे तनाव ते शक-शुबे गी दूर करदे न।

इस कार्यक्रम दा सिद्धा प्रसारण आकाशवाणी, दूरदर्शन, स्वयं, स्वयंप्रभाव, प्रधानमंत्री हुंदे दफ्तर दे यू-ट्यूब ते सूचना ते शिक्षा मंत्रालय दे सोशल मीडिया चैनलें पर बी उपलब्ध रौहग। परीक्षा पे चर्चा छे पिछले संस्करण च विद्यार्थिं गी मतेयानें दे तनाव कशा दूर रौहने दी सलाह दिंदे होई प्रधानमंत्री होरें आखेआ.....

<><><><><><>

PM-France Visit

प्रधानमंत्री नरेंद्र मोदी होर अज्ज संजा'लै पेरिस दौरै पर जा'रदे न। प्रधानमंत्री होर फ्रांस दे राष्ट्रपति इमैनुअल मैक्रों हुंदे कन्नै ए.आई एक्शन शिखर सम्मेलन 2025 दी सांझे तौरा पर अध्यक्षता करडन। शासन च आर्टिफिशल इंटेलीजेंस दा इस्तेमाल करने दे बारै च पेरिस च अज्जै थमां 2 दिनें ए.आई एक्शन शिविर सम्मेलन 2025 शुरू होआ'रदा ऐ। एहदे च केई वैश्विक नेता, उद्योग जगत दे मन्ने-परमन्ने दे लोक ते केई शोधकर्ता हिस्सा लैंगन। प्रधानमंत्री नरेंद्र मोदी होर फ्रांस दे राष्ट्रपति इमैनुअल मैक्रों हुंदे कन्नै इस शिखर सम्मेलन दी सांझे तौरा पर अध्यक्षता करने लेई अज्ज फ्रांस लेई रवाना होंगन। इस आयोजन दा मकसद वैश्विक ए.आई नीतियें गी आकार देने दे कन्नोकन्नी, नवाचार ते नैतिक जिम्मेदारी दा आपूं च तालमेल यकीनी बनाना ऐ। इस आयोजन च 100 शा मते मुल्खें दे नुमाइंदें, उच्ची सतह दे शोधकर्ता, कारोबारी जगत थमां मन्ने-परमन्ने दे लोक ते सिविल सोसायटी दे सदस्ये शिरकत करंगन ते शासन, अर्थ बवस्था ते मौलिक अधिकारें पर ए.आई दे असर बारै चर्चा करंगन।

<><><><><><>

President Kumbh

राष्ट्रपति द्रौपदी मुर्मू होर कल प्रयागराज च महाकुम्भ जांगन। ओह गंगा जमना ते सरस्वती दे त्रिवेणी संगम च पवित्र चलोबी लांगन। राष्ट्रपति हुंदा अक्षयबट ते बड़े हनुमान मंदर जाने दा बी कार्यक्रम ऐ। राष्ट्रपति होर डिजिटल महाकुम्भ अनुभव केंद्र च आधुनिक तकनीकें दे इस्तेमाल राएं कुम्भ दा गहराई ते विस्तार दा अनुभव बी करंगन। उत्तर प्रदेश दे मुख्यमंत्री योगी आदित्यनाथ होर बी इस मौके दउन्दे कन्नै होंगन।

<><><><><><>

LG Youth

उपराज्यपाल मनोज सिन्हा होरें आखेआ ऐ जे नोजवान साढ़ी सब्बने शा बड़्डी दौलत ते ताकत न ते उनेंगी आर्थिक विकास ते समाजक बदलाव गी बढ़ावा देना चाहिदा। आगरा च अखिल भारतीय गालव पूर्व त्यागी ब्राह्मण महासभा दे 46में राष्ट्री सम्मेलन गी संबोधत करदे होई उनें एह गल्ल आखी।

अपने संबोधन च एल.जी होरें नोजवानें गी सरकार ते समाज दे बिच्च दी बित्थ गी पूरने आर्थक विकास गी गति देने ते वंचितें आस्तै कम्म करने दा आह्वान कीता। उनें सांस्कृतिक विरासत गी संरक्षण करने, शिक्षा च सुधार करने ते राष्ट्र निर्माण च महिलाएं दी हिस्सेदारी जकीनी बनाने दा बी आह्वान कीता। स्वतंत्रता सेनानिणं गी श्रद्धांजलि दिंदे होई उनें भविष्य दिणं चुनौतिणं दे प्रति वचनबद्धता ते इक मजबूत भारत आस्तै भाईचारे गी मजबूत करने दी लोड़ पर जोर दित्ता।

<><><><><><>

Announcement

आकाशवाणी जम्मू दे क्षेत्रीय समाचार एकांश आसेआ कठुआ जिले लेई अंशकालिक संवाददाता यानि पीटीसी लेई दरखास्तां मंगियां गेइयां न। इच्छुक आवेदक जेह्दी उमर 24 थमां 50 बरें दे बश्कार ऐ ते ओह कठुआ जिले दा रौहने आह्ला ऐ, इस लेई आवेदन करी सकदा ऐ। मेदवार कश पत्रकारिता च पी.जी डिप्लोमा, डिग्री या कुसै बी पंजीकृत यूनिवर्सिटी थवां ग्रैजुएशन ते पत्रकारिता च 2 बरें दा तजुर्बा होना लोड़चदा ऐ। मेदवार गी कम्प्यूटर पर खबर बनाने ते मीडिया कवरेज दे अनुभव सने सरबंघत लोड़चदे उपकरणें वगैरा दा इस्तेमाल करना बी औना चाईदा। आवेदक जिला सदर दफ्तर दी 10 किलोमीटर दी हद्द दे अंदर—अंदर रौहदा होना चाईदा ऐ। दरखास्त ते लोड़चदे दस्तावेजें दी कॉपी मेदवार गी क्षेत्रीय समाचार एकांश आकाशवाणी पंजतीर्थी जम्मू पिन कोड 180001 उप्पर 15 फरवरी 2025 थवां पैहले—पैहले आइए दस्ती जमा करोआनी होग। इस बारै व्यापक जानकारी आकाशवाणी दी वेबसाइट www.newsonair.gov.in पर उपलब्ध ऐ।

<><><><><><>

Rana Rally

जंगलात ते जनजातीय मामले दे मंत्री जावेद अहमद राणा होरें समानता, न्याह ते करुणा दे महत्व पर लोह पाई ते लोकें गी इक सोहार्दपूर्ण समाज बनाने दी दिशा च कम्म करने आस्तै प्रोत्साहत कीता। जम्मू च गुरु रविदास सभा, कबीर नगर आस्सेआ आयोजित महा रैली गी संबोधत करदे होई उनें एह गल्ल आक्खी। अपने संबोधन च मंत्री होरें लोकें गी समावेशी भविष्य बनाने आस्तै किट्ठे रलियै कम्म करने दा आग्रह कीता। उनें लोकें गी इनें मुल्लें गी बनाई रखने ते सब्बने आस्तै बरोबरी दे मौके जकीनी बनाने आस्तै बी कम्म करने दा आग्रह कीता। मंत्री होरें प्यार, एकता ते मानवता दी निस्वार्थ सेवा पर जोर दिंदे होई समाजिक चुनौतिणं कन्नै निबड़ने च सामूहिक प्रयासं दे महत्व पर बी लोह पाई।

<><><><><><>

Water Shed Yatra Doda

संगठित वाटरशैड प्रबंधन प्रोग्राम – IWMP आसेआ ग्रामीण विकास ते पंचैती राज मैहकमे दे बैनर हेठ डोडा जिले दे भाला ब्लाक दे पंचैत घर बीरारू च वाटरशैड जात्तरा अभियान 2025 दा आयोजन कीता गेआ। डीडीसी अध्यक्ष धनेन्तर सिंह कोतवाल होरें इस जात्तरा गी शुरु करोआंदे होई ग्रामीण सतह उपपर रोजगार दे मौके बधाने ते राई-बाई सरबंधी उत्पादन च सुधार लेई वाटरशैड प्रबंधन दी भूमिका उपपर लोऽ पाई। इस मौके उपपर सरबंधत खेत्तर दे माहिरें-विशेषज्ञें, मुकामी लोकें गी बरखा दे पानी दी सांभ-संभाल सने, मिट्टी दे नरोएपन बी बरकरार रखने ते सिंचाई आहलिएं अज्जै-कल्लै दिए तकनीकें बारै जानकार बनाया ते इनें कम्में च सामुदायिक भागीदारी दे महत्वै उपपर लोऽ पाई। कार्यक्रम दे अखीरै च गल्लबात आहले इक सत्र सने रूक्ख-बूहटे लाने दा अभियान बी चलाया गेआ।

<><><><><><>

Exhibition

जम्मू दी कला सरबंधी सगोसार विरासत दा जश्न मनाने दे मकसद कन्नै संस्कृति विभाग दे कमिशनर सैक्रेटरी के. रमेश कुमार होरें कल जम्मू दे कला केन्द्र च कला प्रदर्शनी दा उद्घाटन कीता। इस नमैश च मन्नी-परमन्नी दिए कलाकार नीना सूद हुंदे आसेआ तैयार कीती गेदी 22 हालिया कलाकृतियां प्रदर्शित कीतीआं गेदिआं हिआं। इस मौके उपपर बोलदे होई कमिशनर सैक्रेटरी होरें कला केन्द्र गी इक बड्डे सांस्कृतिक केन्द्र च तब्दील करने सरबंधी योजनाएं पर लोऽ पाई ते कन्नै एह ऐलान बी कीता जे नमें उभरदे कलाकारें लेई इक मुकामी कला स्टूडियो बी नमें सिरैया विकसित कीता जाहग। अज्ज इस् प्रदर्शनी दा खीरला दिन ऐ। इस मौके उपपर आकाशवाणी समाचार कन्नै गल्ल करदे होई संस्कृति विभाग दे कमिशनर सैक्रेटरी के. रमेश कुमार होरें आखेआ

<><><><><><>

Weather

मौसम विभाग नै अगले दऊं दिनें दरान जम्मू ते कश्मीर च हल्की बरखा ते बर्फबारी होने दी पेशगोई कीती ऐ। अज्ज ते कल मौसम खास तौर पर घाटी च मता खसक्रिय होग। 12 थमां 14 फरवरी बश्कार मौसम खुश्क रौहग ते 15 ते 16 फरवरी गी मौसम बदलोखड़ा रौहग ते हल्की बरखा ते बर्फबारी दी बी मेद ऐ।

जम्मू कश्मीर च इस बारी बरखा घट्ट होई ऐ। आंकड़े मूजब पैहली जनवरी थमां 29 जनवरी बश्कार बरखा च 87 फीसद कमी दर्ज कीती गई।

<><><><><><>